



FIESTE DE PATRIE DAL FRIÛL 2018

A VOLESON DARZIN *lis celebrazions uficiâls dal inovâl, domenie ai 8 di Avrîl dal 2018*

Al sarà Voleson Darzin a ospità lis celebrazions uficiâls de Fieste de Patrie dal Friûl, 941 agns daspò de nassite dal Stât patriarcjâl furlan (ai 3 di Avrîl dal 1077).

L'event al è programât par **domenie ai 8 di Avrîl, tacant des 10.30**. Il corteu, acompagnât de bande de Società Filarmonica Valvasone al partirà de **Cjase Comunâl di Darzin**, in Place dal Municipi, e al rivarà in Place 73° Lombardia pe esposizion de bandiere dal Friûl.

Aes 11.00, inte Glesie di Sant Michêl, il delegât dal Vescul de Diocesi di Concuardie-Pordenon, pre Daniele Rastelli, insieme a pre Italo Gerometta, a celebraran la Messe par furlan.

La **Cerimonia Civil** si fasarà po dopo a Voleson, **tacant des 12.30**, tal Auditorium des scuelis "Erasmus di Valvasone". E tacarà cu la leture de Bole dal Imperadôr Indrî IV, che e rapresente l'at di fondazion de Patrie dal Friûl; po dopo al sarà il salût des Autoritâts e l'anunzi dal vincidôr dal Bant pe composizion dal Imni uficiâl de Patrie dal Friûl, promovût dal ILF "Pre Checo Placerean".

Dopo de polse pal gustâ, tal Cjistiell di Voleson Darzin al larà in sene il **spetacul teatrâl itinerant "Pachis e Patrie"**, par cure di Matarans Academy, Piccola Scuola di Teatro per ragazzi di "La Compagnia dei Guitti". **Ideât di pueste pe Fieste** il spetacul al conte i fats succedûts pardabon te gnot di Sant Martin dal 1582. A son programadis cinc raprezentazions - tra lis 14.30 e lis 17.30 - pensadis tant che un percors in plui fermadis che i spetatôrs a fasaran acompagnâts dai atôrs, drenti de curnis medievâl suggestive. **I puescj a son limitâts e e je duncje obligatorie la prenotazion drenti dai 4 di Avrîl**, contatant l'Ufici IAT di Voleson, dal martars ae domenie, des 10.00 aes 12.30 e des 14.30 aes 17.30. Tel. 0434 898898, email: info.valvasone@gmail.com.

Aes 15.30 e aes 17.00, tal domo di Voleson a son invezit programadis lis **visitis voidadis al orghin splendit** realizât di Vincenzo Colombi intal 1533, acompagnadis di un concerti.

LA STAFETE DES LENGHIS MINORITARIIS

Dopo dal sucès de prime edizion, a acompagnâ la Fieste e torne la **Stafete des Lenghis Minoritariis dal Friûl**, manifestazion sportive promovude de Regjon e de ARLeF e coordenade de Associazion Maratonine Udinese.

E partirà **sabide ai 7 di Avrîl di Aquilee** e, dilunc un percors di plui o mancul 110 chilometris, e rivarà **domenie ai 8 di Avrîl** a Voleson Darzin. La Stafete e taiarà il travuart aes 16.00 intal plaçâl dal Cjistiell di Voleson Darzin. Lis premiazioms, acompagnadis dal spetacul di tambûrs e di sbandieradôrs dal "Grup Artistic Furlan", a segnaran il sierâsi de Fieste de Patrie 2018.

ALTRIS INIZIATIVIS

Lis celebrazions de Fieste de Patrie no son dome inte zornade uficiâl dai 8 di Avrîl, ma a son acompagnadis di un **calendari siôr di events** promovûts su dut il teritori furlan. **Il calendari detaiât des iniziativis al è disponibil su www.arlef.it**

Di segnalâ ancje il concurs a premis **"Emozions furlanis in viaç pal teritori"**, pes scuelis de infanzie, primarie e secondarie di prin grât di dut il Friûl, promovût dal Ufici Scolastic Regjonâl, insieme cu la ARLeF e cu la Provincie di Udin, e che al è rivât ae otave edizion.

--	--	--	--	--	--	--	--

1077 - 2018
FIESTE DE PATRIE DAL FRIÛL
VOLESON DARZIN
AI 8 DI AVRÎL DAL 2018